

2 Tesalonaika

¹ Njai Pol, Sailas agod Timoti, girek e migire yen anj Kris midaen a Tesalonaika na yan anjam na migane ipalu da. Anj Anut idsad Tamad inj Tubun ak Jesus Kristus da, sisem amado da. ² Anut idsad Tamad agod Tubun ak Jesus Kristus da injad ilo panek agod ilo maror da dupananj a.

Jesus Kristus imul ipalu san ru

³ Njai teig taog, manj pempem anj ninjemi wo Anut ilo uyan mupani da. Ago migane dan man uyan a, man dugo, anjam ilo rumok Anut lo man tubun mok ilasa da. Agog nug ninjen o amat dan dam tubun geig ilasa onj da. ⁴ An ninjen o saen manj Anut san Kris midaen lulujad lo mitililani an, anj yanjam mabisa se ya. Ata wo? Fun anjam ilo rumok tubun geig, agod anj Tubud san dal lo atur sakar onj da. Aenta madai inj misilaneke da dupananj pe lo au adu o da, ak man mel an anj patum apani da.

⁵ Kulob a kuai tem ikibiai panad dan man, Anut san bitinaek itaot mok a. Ru e njabol en fun man, muruan wei mi aleg, an lo Anut malan lo inj awok ipananj dop, aben a Anut kagin ipanad san an lo aladu wa. Anj aben an san a, aben an lo au ak ninjen o anj madai gamu akubiani da. ⁶ Kagin a Anut anj o igane yan nek itaot a. Man dugo, injan ilo sou lo tamolpein a gamu muruan dupananj dan mite gup naon muruan ipidinaip, an lo madai tubun ak dile wan itaot geig a. ⁷ Mel en dam inj malan lo itaotan a. Inj anj muruan a ale dan yaes ipananj a, ago dop anj manj da sisem yaes bilabal lo tiladu

wa. Saņeptap saen an ilasa wak i? Saen Jesus inŕsen yai balen tubun ak aman da did panu ibisei dan lo, tinin walal te iganep ilasa wa, agod inŕnen eņel adi dabdabai ak dida dumul dupalu wa. ⁸ Saen an lo, inŕ inŕnen pani naon inŕsen lo inawai geig ak da imul a. Ago dop tamolpein ensauta a Anut ta dulonŕ na, agod tamolpein ensauta a bilaluŕ Tubun ak Jesus niņen o ilo rumok adi dufulaleg dulonŕ gug ta duri na yan dam, naon saian geig ak ifuli ipidinai a. ⁹ Muruan mitep dile wan man, daonŕ pempem yen yau san, amaiak lo dudu diau a. Naod dam ifutanip an lo Anut san madok an patun fo dilasa dop, inŕsan dabai girager anda yan ta dile na wa. ¹⁰ Nal an lo, inŕ imul ipalup inŕsan tamolpein gun ak luluņad lo ilasa dop, yaņak tubun a girager anda yan inŕane wa. An lo dop, tamolpein ensauta a ilod lo rumok an malad bulbal pe malad ti ibol pe dile wa. Agod aņ dam luluņad lo amado wa. Man dugo, saen maņ inŕsan ru mabol ilasa se yan aņ ilom lo rumok a.

¹¹ Maņ mel an niņen o pempem aņ niņemi wo maņsama gudanek igo migane da. Anut inŕsen, aņ inŕnen wagiņ aņane wo idaisuda an niņen o idiraņ alasa wa. Ago dop inŕsan dabai lo, ilo isou dugo yak agane dan, agod urat a ilo rumok lo ilasa dan dam, an fidian aganep itout a. ¹² Maņ ago mugudani dan lo tamolpein aenta aņ niņemi wo idsad Tubun ak Jesus yaņan diabisa wa, agod inŕ lo yak niņen aņ dam yaņam diabisa wa. An lo ilasa san dal an man ilo panek a idsad Anut agod Tubun ak Jesus Kristus da dupanaņ dan, nek an mi a.

2

Kubiaen riñanek tamol

¹⁻² Teig taog, idsad Tubun ak Jesus Kristus imul ipalu san, agod id in da sisem tutumani san dam ninen o kudodom agure wa. Aenkadi Tubun ak san Nal ilasa la yan ninen ago dubol da. Profet ru ta boi, tia, mañsama girek ta boi, tia, ru tim mañ awama lo ilasa ago dubol boi, gidad, ru naok ago yan alon tap, ilom lo ta rumok na wa. Gidad, mañ ru dabai ak lo igo murupaian den alon a, ririan arut dop ananem kankan ta yau imul na wa. ³ Mel an ninen o tamol ta ale funi dop dal ta lo ta irawan na wa. Tia, nal an ta ilasa na dop, awa bitek san nal imug mi ilasa wa, ago dop kubiaen riñanek tamol dam in walal te ilasa wa. Tamol an man daon san gib lo idu san mi a. ⁴ Tamol an tamolpein sad anut gidigidad adi fidian sad ager, agod melmel fidian a tubud igo won ubou ad dile dan sad ager tamol dam imado da. An lo in sen yan an yabisa dop, in anen madok aben a Anut san ubou ab lo yan in anep, an fo imasip igo ibol a, “ñai mi Anut.” ⁵ An ilom in aon boi, saen ñai imug an da tumado na yan, ñai mel a ninen o ñurupaian se yan dag ilom in aon i? ⁶ Agod gamu en, mel a tamol an yabituani imul pe walal te ta ilasa na wan an alon uyan a. In ago imado yaup in san saen fo gup kuai te ilasa wa. ⁷ Man dugo, kubiaen pilalek san dabai en mianuk lo mi tan en lo urat igane la ya. Ak gug, enti in an yabituani imul o ago igane yau dop man, Anut in talpein a dabai saian ak yabituani dan gigin na in anep, an lo dabai saian an ibisei yau a. ⁸ Saen an lo mi kubiaen riñanek tamol an walal te

ilasa wa. Ak gug, Tubun ak Jesus inſan Awan Ur nam tamol an mitep ibili idu wa, kumaen panu lo imul ipalu san lilaman girager an nam, daon ipani wa. ⁹ Kubiaen riſanek san tamol an Jesus gamugo imul ipalu dop ilasa wa. Tamol an Satan san tuon lo ipalu wa. Satan tamol an patun fo itur pe ibinawip, an lo dabai awan isa yan lo kulob girager sewak ak, agod kulob tini urer san dam tamolpein naod na idiri ilasa wa. Melmel an Satan san Ru Sewak ak san mi a. ¹⁰ Agod kagin itaot tia yan san rawek naok sensen ak lo, tamolpein a daon panek san dal diri dan irawai mok a. In daon panek dile mok a, man ata wo, ru rumok an niſen o dumat pe an lo Anut patud ipasi wak diſane san o dumoi da. ¹¹ Nek fun an niſen o Anut in tubun mi ilod iduduſanip an lo inſad ilo sou an gidigidad dop Ru Sewak an niſen o ilod lo rumok a. ¹² Agop an lo fidian a ru rumok ak ilod lo ta rumok nag, kagin saiak an dile dugo ilod ſiſaokan go youd isa dan, bitinaek an lo dutur pe dudu diau geig a.

Atur sakar a

¹³ Teim taoma, maſ nal fidian an e Anut ilon ipanaſ den niſemi wo in ilo uyan mupani man uyanan a. Man dugo, fun lo mok Anut ipilianaſ a, ago tag Awan Urgun idiraſ go gun alasa dan lo, agod ru rumok a ilom lo rumok dan lo dam, patu pasek ale wa. ¹⁴ Kristus san ru anſam na mufulale amaiak lo, Anut an igiaſ an lo patu pasek ipanaſ a. An lo idsad Tubun ak Jesus Kristus inſan girager amaiak an dam ananep amado wa. ¹⁵ Teim taoma, fun an niſen o atur sakar a. Agod Kris kagin mipiteſanaſ an, awama lo alon se yan, agod

a maŋsama girek lo asuti an dam mi abi sakar pe ari uyanan a.

¹⁶ Anut idsad Bai niŋed o imat dugo, iŋsan ilo panek lo maror bubed lo pempem yen yau san, agod mala nouk mel siŋaokan san da ipanad a. Anut nek an idsad Tubun en Jesus Kristus iŋsen ida ¹⁷ maror bubem lo digane dop, dabai dupanan dan lo urat fidian uyan ak agane wak, agod niŋeŋ uyan uyan ak abol ilasa wan dam, aŋ idaisuda geig a.

3

Agudani dop Anut ibinawama wa

¹ Ru wadan, ŋai teig taog, maŋ niŋema wo agudani wa. Ago dop Anut maŋ ibinawamap iŋsan ru imaspalup aben fidian lo yau kisaek oŋ a. Anut asumiani dop panu panu asau ak san tamolpein, luluŋad lo iŋanen ru tubun mi iŋsad leil lo ilasa wa, nek ibol aŋsem luluŋam lo ilasa na yak ago mi a. ² Agod taida mi, aŋ agudani dop tamol saiadi, agod tamol a iŋsad kagin naok senamo geig ak dida, iŋsad tuod lo maŋ patuma ipasi wa. Man dugo, tamol fidian iŋ ilo rumok amad tia ya. ³ Aloŋ ak, Tubun en iŋ awa yabek tamol mi a. Amaiak niŋen o iŋ aŋ isatuanan a. Agod iŋsen mi dumui igo, Satan muruan ipanan o igane dop, naon dal ifutani wa. ⁴ Agod Tubun en aŋ niŋemi wo mel e rumok en maŋ ikubiai panama ya. Ru kagin dugo gubak mi mupanan an aŋ agane da, agod murna dop nek ago mi agane yau a. ⁵ ŋai Anut ŋugudani dop Tubun en aŋ dal ikubiai panan a, an lo Anut san ilo panek ka bubem lo yen a, agod nek Kristus itur sakar na yak igo, aŋ dam ka ago agane wa.

Ayalis dan ninjen o kagin agane wa

⁶ Mañ teim taom, Tubun ak Jesus Kristus yañan lo mañ ru kagin en mupanañ da. Teid taod Kris adi ensauta a urat digane wo dumoi go, inñsad madok an san piteñanek mañ awama lo añane yan ta diri dupani na dan, añ siñired na ta au na wa. Tamol naok ago yak dam dadi ta ator na wa. ⁷ Man dugo, añ añsem mañsama kagin naok dugo woñ ari apani san aloñ uyanan a. Añ ilom isou, saen mañ añ luluñam lo tumado se yan miyalis man tia ya. ⁸ Mañ aenta sad anañ mani se yan, pempem madad na ya. Rumok geig, mañ nal fidian tidom ad urat migane da. Fun dugo, mañ tamolpein aenta añ luluñam lo dumado dan mañ kagin dupanama se yan lo muruan mupidinai man mamoi a. ⁹ Rumok geig, mañ tamol yañama tubun ak mi a. Amaiak ninjen o iloma ibol tap man, mañ ka añ musumianañ dop kagin apanama wa. Gug ago migane wan mamoi a. Man dugo, mañ añsam tinanou igo woñ mumado da, an lo añsem ale dop mañsama madok en mi ari wa. ¹⁰ Agod saen imug mi mañ añ da tumado se yan mañ ru e dabai en mupanañ a. “Tamol ta urat igane wo imoi tap, aenta sad anañ ta yani na wa.”

¹¹ An ninjen o mañ durupaiama ya, tamolpein kadi urat digane wo dumoi g urat ta digane na da. Kawan dutor dop tamolpein aenta sad muruan lo kabuñad mi disoduduni da. ¹² Tubun ak Jesus Kristus yañan lo, mañ tamolpein naok ago yan dutokubol pe urat digane wo mususuñanai dop ru dabai mupidinai da. An lo inñ moni diñanep ate inñaned anañ ka didad a. ¹³ Agod añ fidian niñemi

wo man man igo mabol da. An kagin uyan ak agane wo ilom ta isali na wa.

¹⁴ Aria, talpein ta ru kubiaen girek en lo migire idu yen ta ilon na tap, talpein an an ale wo uyan dop ida ta ator na wa. Man dugo, an ago agane dop man, in miai ifuni wa. ¹⁵ Ak man an sam ager tamol igo won ta agane na wa. Tia, ru dabai ak arupei dop ru kagin dam apani wa. Nek ibol an anem teim mok lo agane dak ago mi agane wa.

Ru wadan

¹⁶ Tubun ak in sen maror san fun. In nal fidian ka bubem lo maror ipan an ak, dal funfun lo dam mi a. Anut ka an fidian da amado wa. ¹⁷ Nai Pol ru wadan naisag banig mok nam ngire ya. Nai girek fidian ngire den lo ago ngigane da. Ata wo, nai banig mok nam girek e ngire den lo, tamolpein fidian dulon man, girek en naisag na mok ipalu ya.

¹⁸ Idsad Tubun ak Jesus Kristus san ilo panek an fidian da amado.

Anut san bilalug foun
The New Testament in the Takia Language of Papua
New Guinea
Nupela Testamen long tokples Takia long Niugini

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 22 Feb 2024 from source files dated 31 Aug 2023

757b3e4e-2023-5b45-893a-ee9294ddeb9d